

07 JAN 2003

SUNTIKAN DANA-EKONOMI/I

SUNTIKAN DANA, PILIHAN LEBIH BAIK UNTUK TINGKAT EKONOMI, KATA PARA AHLI EKONOMI

KUALA LUMPUR, 7 Jan (Bernama) -- Langkah-langkah suntikan dana bagi merangsang ekonomi yang ditimbang oleh kerajaan tahun ini dilihat oleh para ahli ekonomi sebagai pilihan lebih baik daripada mengurangkan kadar faedah untuk mempertingkatkan lagi ekonomi negara.

Memandangkan kadar-kadar faedah kini adalah pada paras terendahnya, mengurangkan lagi mungkin menyebabkan ekonomi terjerumus ke dalam perangkap kecairan, kata mereka.

Secara realiti, terdapat ruang yang mencukupi bagi kadar faedah untuk terus turun disebabkan mudah-tunai yang banyak sekarang dan inflasi yang rendah. Oleh itu, mengurangkan kadar faedah dilihat sebagai pilihan yang berdaya maju.

"Tetapi kadar-kadar faedah adalah agak rendah pada ketika ini dan menurunkan kadar faedah mungkin menjadi isyarat negatif kepada para pengguna. Perhatian berat kita ialah kemungkinan terjerumus ke dalam perangkap kecairan jika kadar-kadar diturunkan lagi," kata seorang ahli ekonomi apabila dihubungi Bernama hari ini.

Tambahan pula, katanya sungguhpun purata kadar-kadar berian pinjaman telah terhenti akibat persaingan sengit, terdapat kemungkinan bagi kadar campur tangan tiga bulan, yang kini berada pada 5.00 peratus, dikurangkan lagi. Tetapi ini nampaknya tipis, sekurang-kurangnya bagi masa ini.

Seorang lagi ahli ekonomi berkata menurunkan kadar faedah boleh melembapkan sentimen, dengan itu mengurangkan perbelanjaan sungguhpun kos dana akan menurun.

Beliau berkata bahawa jika ini berlaku, kesan pengandaan ke atas ekonomi akan menjadi kurang ketara.

"Jadi, untuk mengelakkan perkara tersebut daripada berlaku, suntikan dana bagi merangsang ekonomi nampaknya menjadi pilihan terbaik," katanya.

Semalam, Perdana Menteri Datuk Seri Dr Mahathir Mohamad berkata kerajaan mungkin menggerakkan satu lagi pusingan langkah suntikan dana bagi merangsang ekonomi seperti membelanjakan wang ke atas projek-projek bagi meningkatkan edaran matawang. -- BERNAMA

WNZ SHY OS